



wantok

NESENEL


Niuspepa bilong ol Papua Niugini stret

Namba 171

Bilong wik i stat long 21 Me 1977

Prais 10t.

PASIN BILONG TUDE.





Poto antap i soim Mista Paulias Matane, man i makim Papua Niugini long Amerika na long Yunaitet Nesene, wantaim meri bilong em. Tupela i sanap wantaim Presiden Jimi Carter bilong Amerika wantaim Misis bilong em long bikpela haus bilong presiden, em ol i kolim waitpela haus, insait long biktaun Washington.

Mista Matane nau i laik lusim Washington na sindaun long biktaun New York, bai em i moa klostu long Yunaitet Nesens hetkota long dispela taun. Hia Papua Niugini i laik bungim ol memba bilong ol nupela kantri planti taim na soim mipela i insait wantaim ol.

BAIM WANTOK

Sapos yu laik kisim WANTOK niuspepa i kam long yu stret olgeta wan wan wik bilong dispela yia, yu katim dispela tiket long sisis na salim i kam wantaim K8.00.

NEM BILONG YU:.....
 ADRES BILONG YU:.....

Salim sek o mani oda inap long K8.00 wantaim dispela tiket i kam long:

**WANTOK
 BOX 1982
 BOROKO**

Sapos yu bilong wanpela skul o misin o grup na yu laik kisim moa olsem 10-pela WANTOK wantaim long olgeta wan wan wik, orait yu rait na askim mipela long spesel prais mipela i gat long man i baim planti WANTOK olsem.



AMAMAS

MIPELA I AMAMAS long lukim planti kantri i hariap tru long givim helpim na mani long ol pipel bilong Solomon Ailan, taim bikpela guria i bin bagarapim ples bilong ol. Papua Niugini i givim K50,000. Na Australia na Englan na Fiji na bikpela grup ol i kolim Saut Pasifik Ekonomik Komisin tu i insait wantaim ol.

Sampela arapela bikpela kantri i laik givim helpim long ol, na ol i tok: Tenkyu, mipela inap nau. Em i namba wan taim ol wansolwara i bin soim ol i pilim tru ol i wanfamili. Sampela bikpela kantri i lukim dispela pasin wanbel na i hepi. Na ol misineri tu i amamas long lukim dispela Kristen aidia long tingting na wari long brata i karim kaikai nau.

WARI

MIPELA I WARI long dispela ileksen i laik kamap nau. Mipela i bin traim askim nabaut long sampela hap na mipela i kalap nogut long painim, planti manmeri tumas i no bin putim nem bilong ol long lista bilong vot, em yumi save kolim "common roll". Olsem na nau ol i no inap vot long dispela ileksen.

Ol dispela manmeri i no bilong ol longwe ples o bilong bikbus. Nogat. Planti ol i winim bikpela skul pinis, planti ol i wok insait long ol ofisa bilong gavman yet.

Ating ol dispela pipel i lusim ting long gutpela tok bilong Praim Minista, taim em i tok yumi pipel bilong Papua Niugini, yumi laki tru. Yumi fri long vot. Long planti nupela kantri tumas, i no olsem.

Nogut ol dispela kain pipel i les long vot, bai kamap bihain na sutim olkain tok egens long gavman. Ol i no ken tok. Em asua bilong ol yet, sapos kain kain man i kam insait long gavman na i mekim samting ol i no laikim. Watpo ol i no taitim bun liklik na vot?

Nesenel Katolik Kaunsil

AUTIM OL NUPELA AIDIA

Nesenel Katolik Kaunsil em i wanpela grup lokal Katolik saveman, ol i bilong kain kain provins na i save holim kain kain wok insait na ausait long gavman. Wok bilong Kaunsil em i bilong sanap olsem bris namel long ol Katolik bisop na gavman. Na tu kaunsil i laik autim tingting bilong ol pipel i ken go long ol bisop, long helpim stiaim ol tingting bilong Sios. Long wanem ol Katolik i bin skul pinis: "Mipela olgeta wantaim i sios".

Em hia ol memba bilong Nesenel Katolik Kaunsil: Mis Veronika Gevi (Goroka), Mis Meg Taylor (Lae), Mista Isadore Pikire (Hagen), Mista Bernard Narakobi (Wewak), Mista Henry Paraha (Bereina), Mista Pius Mark (Hagen), Mista Michael Kestapurea (Moresby), Mista Moses Murray (Wewak), Mista Matthias Kauri (Madang), Pater Joseph Knoebel (Goroka), Mista Thomas Ilaisa (Alotau), Pater Kerubim Dambui (Wewak), Mista George Arua (Moresby), Pater Peter Miria (Bereina), Mis Jacinta Hajape (Mendi), Mista Bart Kigina (N. Solomons), Mista Arnold Koim (Moresby), Pater John Momis (N. Solomons).

Ol i bin kibung long Madang long mun Mas na nau tasol ol i bin autim ol minit bilong miting bilong ol. Em hia sampela.

AS TINGTING

Wok bilong Kaunsil em i no bilong pait wantaim gavman. Nogat. Wok bilong helpim dispela kantri i go het strong olsem Kristen kantri tru. Olsem sapos ol i painim sampela lain o sampela lida i wok long daunim ol Kristen aida, bai ol i wok na tokaut strong egens long ol.

Tasol namba wan wok bilong Kaunsil em i bilong bringim aidia na tingting bilong ol pipel i go long ol hetman bilong sios.

KAUNSI LONG DAIOSIS

Ol i ting em i gutpela samting sapos wan wan daiosis i gat kaunsil bilong em yet. Dispela kaunsil bai helpim bisop long ranim daiosis, na ol pipel i ken pilim, sios em i bilong ol tru na ol i insait tru long ranim em wantaim bisop.

Gutpela eksampel bilong dispela em i long Bereina Daiosis klostu long Port Moresby, we Bishop Louis Vangeke i bisop. Pater Peter Miria i larim ol Mekeo na Roro pipel bilong em i ranim kaunsil bilong ol yet.

OL PRIS

Kaunsil i wari na paitim planti toktok long wanem ol i pilim planti pris tumas i lusim wok pris long PNG na tu Katolik Sios i sot long pris hia. Olsem ol i laik bai ol bisop i ken orait long sampela maritman tu i ken kamap pris.

OL BISOP

Ol i ting ol memba bilong Nesenel Kaunsil na ol pipel bilong wan wan daiosis i mas gat taim bilong autim tingting na laik bilong ol, sapos sios i wok long makim nupela bisop bilong ol.

OL KATEKIS

Ol i ting ol katekis i save mekim bikpela wok tru

insait long sios, na ol i mas kisim pe inap long dispela wok. Olsem na ol i laik painim sampela rot bilong apim pe bilong ol.

NESENEL YUT SEVIS

Ol i strong moa long helpim go het dispela aidia bilong wanpela nesenel yut sevis, olsem wanpela gutpela rot bilong helpim sindaun bilong ol yangpela pipel na givim wok long ol.




LIKLIK TAIM NAU - na ol 15 Katolik bisop i bin kibung inap 10-pela de long Mt. Hagen bai autim ol sampela tingting na wari bilong ol. I gat 6000,000 Katolik manmeri long Papua Niugini na Solomon Ailan i wetim sampela gutpela skul na aidia long ol dispela lida bilong sios bilong ol.



MIPELA I STRONGIM BUN bilong wanpela bikpela man insait long gavman. Em i mekim gutpela wok, tasol sampela lesman na sampela man nogut i jeles long em, na ol i tok baksait long em na i krungutim gutnem bilong em. Olsem na man ya i belhevi.

Mipela i stiaim tingting bilong em long dispela liklik stori. Long kantri Persia ol lapun i save tok olsem: "Maski, yu no ken wari sapos ol arapela man i sutim tok long yu. Ol skulmanki i save tromoim ston i go tasol long ol tri i karim kaikai. Long ol tri bilas, nogat."



PAS I KAM LONG OL PIPEL

BILONG WANEM KISIM MARASIN FRI?

Dia Edita - Mi laik bekim pas bilong wantok ya Nick S. Avene bilong Mt. Hagen em i bin kamap long Wantok Niuspepa long Sarere de namba 26 bilong mun Mas, 1977. Em i bin tok, "Ol plisman i no ken baim haus sik long taim ol i gat sik na i go kisim marasin long em."

Yes wantok, dispela tingting bilong yu ol plisman long i no ken baim haus sik long taim ol i gat sik na go kisim marasin long em i wanpela rabis tingting tru, na mi askim yu long lusim dispela tingting plis, long wanem:

1. Yumi kisim selp gavman na independens pinis na yumi mas putim kamap tru mining bilong "selp rilaiyans", wanpela bikpela tingting long et poin plen bilong gavman bilong mipela.

2. Ol nes, sista na dokta tu i save baim marasin sapos ol i go kisim marasin long haus sik taim ol i gat sik. Mi no ting ol i save kisim nating marasin.

3. I no ol plisman tasol i save helpim ol man. Nogat tru. Ol manmeri em ol i holim ol kain kain wok i bilong helpim ol man tu na dispela kain ol wok em ol i kolim Sevis (Service).

4. Tingim tarangu ol manmeri bilong ol ples bilong mipela. Ol i no wok mani olsem yu tasol ol i save baim haus sik.

Yu pinisim wok mani na husat i baim yu? Yu ting yu save helpim ol man nating na i no gat man i baim yu? Tingting gut wantok. Twenti toea long baim haus sik i no olsem foti o fifti toea yu save lusim long baim bia.

Sapos yu tingting gut bai yu ken lukim olsem dispela 20t yu tromoi long baim haus sik i bilong helpim kantri na pipel na yu yet

tu. I mobeta ol i rausim 20t long pe bilong yupela ol plisman na salim i go long haus sik bilong baim marasin, sapos yupela ol plisman i laik kisim nating marasin long ol haus sik o ol klinik.

Em tasol liklik tingting bilong mi na mi ting wantok ya bai amamas long ritim pas bilong mi. Tenkyu tru.

Luke W. Stalen,
Aitape/W.S.P.

YU NO SEKSEK NA HAIT

Dia Edita - Long Sarere namba 2 de bilong mun Epril Wantok Nius, mi ritim wari bilong Johnny Batari. Em i wari na i askim dispela askim "watpo marit long Haus Lotu?"

Lukim, brata Batari, sapos yu laik pilai soka i gat lo o rul bai pilai i ran gut na i gat amamas wantaim. Sapos yu laik tisa i gat lo yu mas bihainim bai yu wok stret wantaim ol narapela tisa.

Olsem marit tu i gat lo. Laik bilong yu i ken strong tasol wanem bai i sanapim bai i sanap strong oltaim? Ring em i mak tasol. Laik yu pasim long lo bilong God na long ai bilong em i samting tru.

Watpo yu seksek long dispela lo bilong God na yu marit hait. Yu save gut long dispela lo na yu pret. Yu pret bai yu no inap friman long laik. Yu laik fri bai yu ken kisim na rausim wanem meri yu laik, bikos yu hait long lo. Watpo yu wok hait? Em hia ol askim bilong mi i go long yu.

1. Wanem kain pikinini bai i kamap long ol meri yu maritim na pinis lusim na kisim nupela?
2. Wanem kain bilip bai ol pikinini bilong yu i bihainim?
3. Husat bai i kamapim gutpela famili, friman o man i bihainim lo.

Mi wet long lukim bekim bilong yu.
Helen Taulam,
Lihir/Nu Ailan.

LUKLUK RAUN EM I ORAIT

Dia Edita - Hia mi laik bekim wanpela pas Mathew Mali i bin raitim i kam long Wantok Nius.

Poroman hia i bin tok long ol memba bilong palamen i westim mani bilong gavman nating, taim ol memba i go lukluk raun long narapela kantri.

Sapos yu poroman yu i no indai yet yu stap yu traim na ritim gut bekim bilong pas bilong yu. Man yu wanpela saveman o man i no gat save? Ating yu go long wanpela liklik skul tru we ol tisa long dispela hap i no save lainim ol sumatin gut.

Taim ol memba i lukluk raun long arapela kantri ol i gat as long dispela samting. Ol i no gat rait long tok "o mi gat planti mani i stap mi go visitim Indonesia, India na Amerika." Ol i no gat rait long spentim mani bilong gavman nating. Ol minista i sindaun na toktok long dispela katim mani long di-

velopim kantri na tu katim sampela mani long spenim long visitim arapela kantri.

Memba i go long Foren kantri long toktok wantaim ol bikman long mekim pren wantaim ol, o ol i go long wanpela bikpela miting. Na tu ol minista i save long kisim moa save long ol samting i no go het gut long dipatmen bilong em.

Yu bin tok long ol memba i westim mani tasol. Tasol gavman i gavman na em i gat as long kain wok olsem. Dispela kantri i wanpela yangpela kantri na yumi i mas kisim save long ol olupela kantri husat i bin develop pinis long helpim kantri i go het long mekim dispela yumi mas spenim sampela mani.

Em tasol long bekim bilong mi na yu i no ken belhat long mi.

Mas Zacchaeus,
Wabag/Enga.

PIKSA LONG MANI

Dia Edita - Em nau mi laik autim sampela samting i no gutpela tumas long kantri bilong yumi PNG.

Bilong wanem gavman i no putim pes bilong wanpela man long K20.00 not bilong Papua Niugini.

Bilong wanem tru na gavman i yusim piksa bilong ol animel long mani bilong mipela PNG. Kantri bilong yumi PNG, em i kantri bilong animel o ol abus? O em i kantri bilong yumi ol man?

Bilong wanem na gavman i putim o kolim wanpela gutpela na naispela nem tru long Papua Niugini. Gavman i kolim PNG i kristen kantri. Bilong wanem dispela nem kristen kantri? Nogut ol sampela kantri i tingting o toktok olsem PNG em i kantri bilong ol abus. I no kantri bilong mipela ol man.

Gavman i mas putim piksa bilong Praim Minista, Mista Michael Somare long K20.00 not. Mista Somare i namba wan man long sanap namba wan o pes man i sanap het bilong gavman bilong PNG.

Sapos PNG i kristen kantri, orait gavman i mas makim wanpela memba i sanap minista bilong Sios. Em bai i gutpela tru na i winim ol sampela kantri tu. Bikos PNG i namba wan kantri long kisim dispela nem. I tru PNG i wanpela liklik na yangpela kantri.

Tasol PNG i winim ol arapela kantri long kisim naispela nem long kristen kantri. Sapos yupela ol brata i laik skruim sampela aidia moa i go i orait.

Em tasol mi i gat long en. Pren bilong yupela.
Michael Joe Bip.
Lumi/W.S.P.

MIPELA OL MERI I SO OV

Dia Edita - Alis Young i wari bikos ol meri long Papua Niugini i so ov. Em i tok. "God i wokim man na i no tok, rausim gras o sevim skin."

Tok bilong yu i tru. Watpo man i rausim gras long wasket? Mi ting i laik luk smat o sampela kain tingting long rausim.

Ol dispela meri i sevim aigras i gat wankain tingting. Bilong wanem yu tok "Ol meri bilong PNG"?

Yes, na yu tok tu olsem ol i laik misis. Mi laik save Misis i wanem kain meri tru?

Mi kolim Veronica Somare, Misis Veronica Somare na i no min olsem em i sevim aigras.

Yes Alis Young, tokim ol bai ol i save long mining bilong misis bai ol i no ken luk olsem doli o loli yu bin tok long pas bilong yu.

Miss P. Omisong,
Nu Ailan.

SALIM OL
PAS I KAM
LONG:
WANTOK
BOX 100
BOROKO

MANUS I NO SAVE LONG SANGUMA

Dia Edita - Wanpela samting mi save toktok long em i go olsem. Mi save harim long redio bilong mi long taim bilong nius. Long olgeta provins ol i save kilim man long naip o kilim man long ka o tu long posin na sanguma.

Olsem wanem yupela i tok Papua Niugini i kristen kantri na stil yupela i save stap kilim man long naip o ka na posin na sanguma.

Ating mi ting i no stret liklik long tingting bilong mi. Mi ken tokim yupela, mipela ol Manus i no save mekim olsem. Mipela i save pret. Nogat tru.

Em tasol mi P.J. Ponio,
Manus.



OL AILAN

MERI KISIM

MOA SAVE

Wanpela grup meri i bin lainim planti kain samting long wanpela liklik woksap o skul i bin go inap 4-pela de long Komyunifi Senta long Namatanai long Nu Ailan.


Wanpela teknikal ofisa, Mis Kathy Tanemberg, na trening ofisa Jeri Moran bilong ofis bilong Bisnis Developmen i bin ranim dispela kos.

Ol meri i bin kam long Namatanai klap bilong ol meri bilong taun na bilong ples na long Salimuna Klap. Na ol i bin skul long planti kain we bilong wokim olkain samting long rop na laplap, em ol i ken salim long maket.


Wanpela samting ol i bin lainim em ol i kolim makrame. Em i wanpela pasin bilong pasim kain kain buk long rop na string bai ol i ken wokim brasbel, na bilum, na liklik bet hangamap bilong pikinini, na hanbek, na tu sampela rop bilas bilong hangamap long banis.

Narapela samting ol i save mekim i go olsem: ol i wasim laplap insait long wara i gat kala kala na olsem ol i putim kain kain mak long laplap. Olsem tu ol inap wokim olkain bilas long laplap na naispela klos.

Sapos sampela lain meri long Nu Briten o Nu Ailan o Manus i laik ranim wanpela woksap olsem, ol i mas rait tasol i go long Ofis bilong Bisnis Developmen long Rabaul. Dispela dipatmen i ken skulim ol tu long pasin bilong wokim olkain samting long mambu bilong bus, long ol kramsel bilong nambis, long pasin bilong wokim sospen graun, na bilong wokim aven bilong kukim bret samting. Ol dispela kain samting i helpim sindaun bilong ol pipel long ples na i soim ol long olkain pasin bilong winim mani.



Antap ol i redim laplap bilong penim kala kala long en. Daunbilo ol meri wokim wanpela bet hangamap bilong pikinini.



Long lephan daunbilo ol meri i lainim nupela we bilong pasim wanpela buk ol i kolim makrame, long baklain na string. Aninit ya yumi lukim ol i amamas long ol samting ol i bin wokim long skul.



Senta onaim plisman

Long 4 Epril long hap-sait bilong hetkota ofis bilong Amerika long Port Moresby ol i bin opim wanpela liklik haus piksa na i givim nem Sega Birito Senta long en.

Long dispela senta bai ol i soim muvi na pilai musik na hangamapim tu olkain poto na kaving samting bilong PNG na Amerika. Ol dispela samting bai i gat wok long pasim gut tupela pren: Amerika na Papua Niugini. Na dispela nem Sega Birito helpim tu dispela wok.

Sega Birito em i wanpela plisman bilong bipo. Em i bin mekim gutpela wok tru long helpim ami bilong ol Amerika taim ol i bin kamap pait long helpim Papua Niugini long winim woa na winim bek kantri. Long dispela taim Sega em i plisman na i kisim spesel trening long Australia na

Nu Silan. Na bihain em i kam bek olsem soldia na i joinim pait long Solomon Ailan na Bougainville na Torokina na Finschhafen na Manus. Long dispela gutpela wok bilong em Amerika i bin givim em wanpela medal i luk olsem sta bras. Em wanpela tasol insait long PNG i kisim dispela spesel medal. Olsem ol Amerika nau i laik givim nem Sega Birito Senta long dispela nupela haus piksa ol i wokim long Moresby.

Sori, long yia i go pinis Mista Sega yet i bin dai. Tupela pikinini man bilong em i bin kam long dispela selebresen amamas long papa bilong tupela. Mama i bin karim Konstabel Sega long yia 1906 long wanpela liklik ples klostu long Waria long Morobe Pro vins. Em i bin mekim wok plisman inap 30 yia. Em i sevis long yia 1965 na bihain em i kamap memba

bilong Waria Lokal Gavman Kaunsil.

Misis Olmsted, em i makim Amerika long Papua Niugini i bin stori long ol dispela samting. Na Gavana Jeneral Sir Tore Lokoloko i bin bekim tok olsem: Olsem long taim bilong woa, nau tu PNG i laik poromanim Amerika olsem pren tru. PNG i nupela kantri; Amerika i bin winim 200 yia independens. Mipela i gat 3 milion pipel; Amerika i gat 214 milion. PNG i stap long wanpela arere bilong bikwolwara Pasifik na Amerika i stap long arapela hap. Na olsem yumi olgeta i wansolwara tasol . . . na pren.



Poto antap i soim Sega Birito long yia 1976. Aninit long lephan yumi lukim tupela pikinini bilong Birito, em Jack na Arua. Misis Olmstead i makim Amerika i sanap wantaim Gavana Jeneral Sir Tore Lokoloko.



LO BILONG MEKIM WOK POSIN

Minista bilong Jastis, Mista Ebia Olewale, i bin askim pinis lain ya ol i kolim Lo Rifom Komisn long lukluk gut na painimaut moa long ol kain kain wok posin na wok sanguma i save kamap insait long Papua Niugini na ripot long em.

Wok posin na wok sanguma i bin pretim planti tausen manmeri na pikinini, planti pait i bin kamap, na planti moa ol arapela i bin indai pinis long en.

Lo bilong gavman egens long wok posin i save bagarapim ol pipel. Tasol em i no egens kain wok posin i save pinisim sik.

wantok
Newspaper bilong ol Papua Niugini

Papua New Guineans' own national weekly in Melanesian Pidgin.

Editorial Office:
 Box 1982
 Boroko
 Papua New Guinea
 Phone: 25.2214
 Telex: WANTOK
 NE 22213

Branch Offices:
 Box 396
 Wewak
 Phone: 86.2488

Box 90
 Rabaul
 Phone: 92.1355

Box 111
 Wabag.

Australian Advertising Representative:
 Kevin Engel
 8 Duraba Pl.
 Caringbah (2229)
 Phone: 525.6263

Subscription rate:
 Annual: K8.00.

WINIM MANI ISI TUMAS

PAINIM NA KISIM OLPELA TAIA I KAM
 MIPELA DUNLOP I SAVE BAIM

DUNLOP

LAE: Aircorps Rot - klostu long maket

KOMISINA STRETIM

TOK LONG DRING


Mista Henry Veretau, Provinsal Komisina bilong Is Sepik, wantaim komisin bilong bosim ol strongpela dring long provins, i bin autim sampela tingting na tok save long ol lo bilong kisim laisens bilong salim ol strongpela dring.

Ol i tok olsem: Man o stuakipa o ples i no ken kisim laisens bilong hambak long en tasol. Em i mas tingim gut, olsem wanem dispela laisens na pasin dring i ken helpim laip bilong ol pipel nabaut long em. Na ol pipel bilong ples o viles yet i mas tingting gut, ol i laikim wanem kain ples. Strongpela dring em inap long helpim sindaun bilong ol o nogat.

Mista Veretau i tok klia: Nupela pasin bilong dring planti na spak i bin barapim gutpela laip na sindaun bilong planti pipel long ol liklik ples na long taun tu. Ol maritpipel nau i pait planti. Ol i no sindaun gut. Mani i lus long dring na i sot bilong baim skul fi bilong ol skulman-ki. Planti taim mani i lus long dring na olsem bilong baim gutpela kaikai i no gat. Na as bilong ol dispela samting em dring tasol.

Man i holim laisens bilong salim strongpela dring, em i mas wok gut wantaim ol plisman bilong gavman na bilong ples. Inap nau planti dispela man i holim laisens i ting plisman em i birua bilong bisnis bilong em.

- Nau Is Sepik Provins i gat Laisens Inspekta bilong bosim ol ples i kisim laisens pinis. Em bai raun na painimaut sapos man i holim laisens o i laik kisim laisens i bihainim ol dispela
- Strongpela dring i helpim o bagarapim sindaun bilong pipel long dispela ples?
 - Man inap lokim gut ples we bia o strongpela dring i stap o nogat?
 - Ol pipel long ples i egens long laisens o i orait long en?
 - Man i holim laisens o i laik kisim laisens, i mas i gat K2,000.
 - Stua bilong em i no bilong salim bia tasol?
 - Stua i no stap longwe tumas long plis stesin?



Poto i soim Mista Hnery Veretau, Provinsal Komisina bilong Is Sepik Provins, wantaim Sir John Kerr, Gavana Jeneral Jeneral Bilong Australia, taim em i kam lukim Maprik long 1975.

Tupela stori bilong dispela pes i ripot long sampela tok bilong Mista Veretau.

15 VILES BUNGIM K3,174 LONG WOKIM ROT

I no longtaim i go pinis, ol pipel bilong 15 viles long hap bilong Saussia Lokal Gavman Kaunsil long Is Sepik Provins, i bin bungim K3,174 olgeta long wokim wanpela rot ol i kolim Tangori Yekimbolye rot.

Samting olsem 500 pipel i bin bung long wanpela kibung long dispela taim yet na wan wan bilong ol i putim K10, K10, long dispela wok.

Wanpela lain insait long provins ol i kolim ol Provinsal Menesmen Tim, i bin givim ol K1,000, em i kam yet long Rural Impruvmen Fan.

Provinsal Komisina, Mista Henry Veretau, na Interim Primia bilong Is Sepik Provinsal Gavman, Pater Kerobim Dambui, tu i bin i stap long dispela taim. Tupela i bin tokim ol lain ya olsem, tupela i amamas nogut tru long lukim ol pipel i laik helpim ol yet.

Komisina Veretau i bin tokim ol olsem, Provinsal Gavman bai i amamas tru long helpim ol lain viles o pipel olsem, em ol i laik helpim ol yet pastaim.

Ol pipel i gat sampela bisnis pinis long dispela hap olsem kopi, kakau, na banis bulmakau. Na dispela bai i mekim isi long ol long skruim sampela moa wok i go het.

Ol i bin tokim 2-pela bikman olsem, ol i no inap long singaut long sampela mani olsem bekim long ol sampela samting bilong ol i bin bagarap long taim ol man i wokim rot ya.



Cyclone

Joseph Haw wantaim sampela 200 bulmakau bilong em long 1,330 eka fam bilong em long Sogeri, Port Moresby.



Long Australia dispela kain banis igat 7-pela waia i win tru long banisim ol bulmakau. Waia bilong en i strong moa. Na 3-pela ret-pela waia (antap, namel na daunbilo), em inap long banisim tru olkain bulmakau.

Em i isi tru long sanapim dispela kain banis. Yu ken putim ol pos longwe longwe inap long 20 mita.

I gat wankain banis tu bilong ol pik na ol sipsip.

CYCLONE DOUBLE-GRIP (NEW GUINEA) PTY. LTD.

A subsidiary of Boral Limited

P.O. Box 804, PORT MORESBY, P.N.G.

Telephone 25.6744

Long Niugini : GOROKA 72.1653 LAE 42.3181 MT HAGEN 52.1169

CYCLONE





DIVELOPMEN LONG SOLOMON AILAN

Yunaitet Nesens Komiti bilong wari long ol kantri i no kisim independens yet i bin tok pinis olsem em i amamas wantaim wok bilong gavman na konstitusèn i kamap nau long Solomon Ailan.

Gavman bilong Englan nau i wok long lukautim Solomon Ailan.

Ol tokman bilong Chile, India, na Indonesia na Englan i bin tok olsem, ol Solomon Ailan pipel yet i mas tokaut long laik bilong ol, long wanem taim ol i laik kisim independens o taim ol inap long ranim olgeta wok bilong gavman bilong ol yet.

Ol tokman i tok tu olsem ol pipel nau i redi long ranim olgeta wok bilong ol yet long politik, bisnis, sosol wok, na ol i no pret long wanem samting bai i kamap long bagarapim gutpela sindaun bilong ol.

WOK BISNIS

Ol tokman i tok, Solomon Ailan i gat wankain ol wari olsem ol arapela yangpela kantri, long wanem ol i save mekim mani tasol long ol kaikai samting em ol i groim long Solomon na salim i goaut long ol arapela kantri long baim.

Ol memba bilong komiti i bilip olsem, bilong stretim dispela wari, ol i mas i gat gutpela developmen plening na wok bung wantaim.

Ol i tok olsem, sapos ol pipel i planim gaden bilong ol long kamapim kaikai na tu i laik salim long kisim mani, em bai inap long kisim mani, em bai inap long kamapim gutpela sindaun bilong ol, long wanem, ol bai i kisim moa trening long pasin bilong planim planti kaikai na salim. Dispela bai inap tu long helpim kamapim moa wok bisnis na mani na ol pipel yet bai i ranim ol.

TRANSPOT, EDUKESEN

Ol memba bilong komisin i tok olsem: wok bilong kamapim bikpela transpot, na tu ol liklik wok bisnis i mas i go long han bilong ol Solomon Ailan pipel yet.

Long edukesen, komiti i tok, em i no klia gut yet sapos nupela fri pablik skul sistem em i bin kisim ples bilong pablik-praivet sistem long 1976, bai inap long givim gutpela edukesen long olgeta pikinini long Solomon. Bipo sampela skul i no stap insait long edukesen dipatmen bilong gavman. Nau olgeta skul i insait pinis.

Komiti i bin askim tu sapos Solomon inap long kamapim wanpela kain skul tasol bilong olgeta pipel. Em i tok tu olsem, em i ting, gavman bilong Solomon i ken mekim moa wok bilong kamapim vokesenel na teknikal trening i go bikpela moa.

WOK NA PE

Long ol toktok bilong wok, komiti i tok olsem i no longtaim i go pinis, ol i bin apim mani bilong ol wokman i go antap long samting olsem 13c long wanpela aua. Ol i save wok 45 aua long wanpela wik.

Komiti i no save gut sapos dispela pe bai inap long ol wokman i yusim long sindaun bilong ol.

Komiti i tok long moa lokal pipel i mas holim bikpela wok bilong gavman. Gavman i mas i gat wanpela polisi we ol i ken givim moa trening i go long ol Solomon Ailan pipel long kamap na holim ol bikpela wok bilong gavman.

KANTRI PATI LIDA TOKAUT EGENS LONG GAVMAN

Mista Michael Pondros, namba tu lida bilong Kantri Pati na memba bilong Manus, i bin tok ol i mas senisim sampela lida long gavman. Long tingting bilong em, ol i mas senisim Praim Minista na Minista bilong Fainens.

Mista Pondros i tok, pati bilong em (Kantri Pati) bai pait long palamen bilong wokim sampela nupela lo bilong givim dinau long ol pipel nating long ples - em ol i no gat wanpela liklik hap mani bilong statim bisnis o wok, tasol ol i gat gutpela save na tingting - na dispela em i bikpela samting inap long strongim askim bilong ol long kisim dinau.

Mista Pondros i sutim tok long gavman, i no bin tingting long ol smolpela man. Na em tu i laik bai olkain faktori i mas kamap long PNG. Faktori bilong kopi na kakao na pinat na mit kakaruk. Na bai PNG inap long salim ol dispela kain ol samting i go long ol arapela kantri na winim mani olsem.

DUNLOP

RADIAL

STEEL RADIAL

RADIAL



SP SPORT

YU TU I RAN I GO LONG

Manahu na Gabaku Strit
Gordons (Port Moresby)

Aircorps Rot
klostu long maket
Lae

SMATPELA
NARAKAIN TRU

Gat ain insait
Ran longtaim moa
Pasim rot tru
I no bikpela mani tumas



SP STEELMAX 70
(SP SM 70)



SP HI-TOURING
(SP HT)

GO LUKIM DUNLOP - KISIM SPESEL PRAIS - GAT OLKAIN TAIA

OL MERI TOLAI

SKULIM LIDA

BILONG OL

Wanpela lain bilong 30 ofisa na lida na hetmeri bilong planti klap bilong ol meri insait long Kokopo Komyuniti Gavman eria long Is Nu Briten Provins i bin kisim wanpela kos inap 10-pela de bilong lainim ol pasin bilong bosim olkain wok na bikpela grup pipel.

Ofisa bilong Komyuniti Developmen long Is Nu Briten, em Mista Karalus Walangat, i tok em i namba wan taim ol i bin traim skulim ol lida bilong ol klap bilong ol meri i stap long dispela hap bilong provins.

Ol lida meri i bin kamap long ol ples Kabakaul, Takubar, Vunamami, Bitavavar, Malakuna, Uagunan, na Bitapabeke. Na dispela miting na kos ol i bin givim long Vunamami Komyuniti Senta.


CHAN AMAMAS LONG PNG BENG GO HET GUT

Mista Julius Chan, Minista bilong Fainens, i bin tok amamas long PNG Beng long gutpela go het bilong em insait long dispela tripela yia. Em i bin tok, long dispela taim beng i bin dabolim mani ol pipel i bin putim insait long em, na tu em i dabolim oi dinau em i givim long ol pipel.

Bipo tru ol pipel i bin putim K62 milion kina insait long beng; nau em i winim K120 milion. Na ol dinau em i kalap long K30 milion inap long K60 milion.

Mista Chan i tok, em i soim ol pipel bilong PNG i save yusim gut dispela beng na i gat bilip long em na wok bilong em.

PNG Beng i gat 17 ofis bilong em nabaut long kantri. Na tupela ofis ya i stap insait long tupela trak i save raun nabaut na kamap long ol liklik ples longwe long taun.



Mista Alkan Tololo

Tololo i tok : I NO GAT PLANTI TISA

Mista Alkan Tololo, Seketeri bilong Edukesen, i tok, sampela pipel i bin givimaut sampela tok save i no tru. Ol i bin tok, i gat planti praimer tisa tumas. Em i no tru.

Mista Tololo i tok olsem: Dipatmen bilong Edukesen i bin makim 8,450 ples bilong ol praimer tisa long yia 1977. Na 8,100 tisa tasol i bin kamap long wok.

Samting olsem 300 tisa i no laik wok long Hailans.

long provins bilong ol.

(2) Planti tasim ol tisa marit i go wantaim man bilong ol long wok long narapela provins. Na i no gat spes bilong moa tisa long dispela provins. Olsem na tisa meri ya i no gat wok. Tasol i asua bilong em.

(3) Sampela taim ol studen i winim tisa koles pinis, i save sindaun long ples inap wanpela yia samting bipo ol i kisim wok long ples dipatmen i bin makim long ol.

Ol dispela i no ken kirap na tok ol i no gat wok. I gat wok; tasol ol i no laik go. Ol i laik wok long nambis tasol; na i no gat spes i fri long nambis.

Mista Tololo i tok: ol tisa i mas tingting pastaim long kantri na bihain tasol long pinisim laik bilong ol.

Na i gat sampela mo as bilong wanem sampela tisa nau i no stap long skul.

(1) Planti tisa bilong nambis i no laik wok ausait



MASKI NO GAT ROT TASOL I GAT

Yamaha Trail



Sapos yu laik raun long ol ples i no gat rot, maski, em i samting nating wantaim Yamaha Trail DT motobaik. I gat kain kain: sampela i no hevi na inap long ol meri. Na sampela gen i gat masel tru na inap long man i save spid. Maski yu laik go long wanpela ples, Yamaha inap bringim yu i go.

DT125



ELA
MOTORS LIMITED

**Burns
Philp**
GROUP OF COMPANIES

DT100



GAVMAN LAIK WOKIM PROGRAM

BILONG BOSIM OL FAMILI

Minista bilong bosim ol bus na wara samting, em Mista Stephen Tago, i wok wantaim sampela gavman dipatmen bilong redim wanpela program bilong lukaut gut long hamas pipel i stap insait long PNG.

Wantaim long sampela dipatmen bilong Yunivesiti bai gavman i lukaut na glasim gut ol dispela samting:

- (1) Long wanem hap ol meri i save karim moa pikinini - ating long taun o long bus o long wanem provins o hap
- (2) Ol pipel i save sindaun i stap long wanpela hap tasol, o sampela lain pipel i save muv i go nabaut long narapela hap
- (3) Ol pipel i save bihainim ol aidia bilong famili plening o nogat
- (4) Ol pipel i yusim olgeta graun bilong ol, o liklik hap tasol

Mista Tago i tok ol pipel bilong PNG inap long dabolim namba bilong ol insait long 20 yia. Na em i wari. Sapos i gat planti pipel moa long PNG, bai yumi kisim we moa skul na moa helt sevis na moa graun na moa wok?

Em i tok, i tru, Papua Niugini i gat planti hap yet we i no gat planti man na we graun i stap nating. Tasol em i laikim pasin bilong famili plening i ken stiaim ol aidia bilong planti pikinini i no ken kamap hariap tumas. Nogut bai planti wari na trabel i kamap. Sapos namba bilong ol pipel i go het isi isi, bai nogat bikpela wari tumas.

Mista Mekere Morauta, man bilong bosim ol prais long ol stua, i bin tok save long gavman i bin kotim 12-pela stuakipa long mun Februeri na ol i bin baim kot inap long K885. As trabel bilong ol, Ol i bin apim tumas prais



Mista Stephen Tago



Mista Kaibelt Diria

SEPIK HAIWE TRANSPOT BEKIM OLGETA DINAU

Long namba 21 de bilong mun Mas, man i go pas long Sepik Transpot Haiwe long Is Sepik Provins, Mista Labu Yawimberi, wantaim 7-pela poroman bilong em i bin bekim olgeta dinau mani bilong ol i bin kisim long Developmen Beng long yia i go pinis.

Labu wantaim ol lain bilong em i bin kisim dinau inap long K75,000 olgeta long wokim ol rot insait long Is Sepik Provins, na tu wokim bikpela rot i go kamap long Wes Sepik Provins.

Namba bilong las dinau mani ol i bekim long en, em i K2,784. Labu i bin givim dinau K2,784 sek mani i go long han bilong man i bos long Developmen Beng long Wewak, Mista Igoriom Jkwaliang.

Dispela Sepik Haiwe Transpot Kampani i bin kisim 9-pela bikpela tipa trak na olgeta wantaim i wok gut yet.


Bihain long dispela seremoni, ol lain bilong Labu i bin mekim liklik sindaun long namba wan bilong Developmen Beng, na namba wan bilong Papua Niugini Benging Koporesen.

NUPELA HAUS TELIPON OP LONG WABAG:


Long 21 Epril, Minista bilong Pos na Telegrap, Mista Kaibelt Diria, i bin opim tru nupela haus telipon bilong Wabag taun.


Bipo Wabag i no gat telipon. Nau em i wankain olsem ol narapela taun insait long Papua Niugini. Em inap long ring long ol kantri longwe tu.

Nau i gat 5-pela telipon i wok. Bihain bai 15 moa i kamap.



THE INVESTMENT CORPORATION OF PAPUA NEW GUINEA





* Long poto antap ya yumi lukim wanpela wokman bilong dispela kampani, Hona Tavati, i wok long sekhanim Mista Bono Azanifa, M.P. bilong Henganofi Open, E.H.P., taim em i baim sampela sea long dispela kampani.

BAIM SEA LONG INVESMEN KOPORESEN
BILONG PAPUA NIUGINI

na bai yu kisim winmani bilong wanpela bikpela bikpela kampani tru

Sapos yu laik save moa long we bilong kisim winmani, yu rait long: Investment Corporation
P.O. Box 155
Port Moresby

NEM BILONG YU:

ADRES BILONG YU:

.....

HUSAT I DAI PASLAIN ?

Mama i karim tupela boi long wanpela de. Tupela boi i stap wantaim papamama na 3-pela yia i go pinis. Bihain papamama bilong tupela i dai pinis. Olsem na tupela boi yet i stap i go na kamap bikpela tru. Longpela bilong tupela na patpela bilong tupela i kamap wankain tasol.

Long wanpela de tupela brata i hangre long abus. Olsem na tupela i go long bus bilong painim abus. In-sait long bus, Mai i lukim tupela diwai i wankain olsem tupela boi yet. Longpela na patpela bilong diwai i luk olsem tupela yet. Nau Mai i tokim Ku: "Lukim tupela diwai i makim mitupela. Olsem na mi laikim mitupela i testim dai bilong mitupela long tupela diwai. Ku! Yu teke-we skin bilong wanpela diwai, na mi tekewe skin bi bilong narapela diwai. Sapos tumora mitupela i kam lukim diwai bilong husat i dai, dispela boi bai i dai pastaim.

Nau tupela boi i tekewe skin bilong diwai pinis, na i kam long haus na slip. Tumora long moningtaim tru, tupela i kirap i go long bus bilong lukim diwai asde tupela i bin tekewe skin long en.

Tupela i stap longwe na i lukim diwai bilong Ku i dai pinis. Dai bilong Ku

nau diwai i kamapim long ples klia. Tupela i bel hevi nau. Ku i tingting planti long dai bilong em. Em i tok: "Wanem taim bai mi i dai?"

Mai i sori nogut tru long brata bilong em bai i dai. Em i tok: "Bihain bai mi i stap wantaim husat?" Nau Mai i kukim planti pik na givim Ku i kaikai na bihain em i dai.

Nau 3-pela de i go pinis, na Ku i dai nau. Mai i kraimoa na planim em klostu long haus bilong em. Foa-pela mun i go pinis nau, Mai i laik lukim diwai bilong em i dai o no gat. Olsem na em i go long bus. Diwai bilong em i stap laip yet. Bilong Ku i drai pinis na planti binatang bilong kaikai i pulap i stap long dispela diwai.

Mai i brukim dispela diwai bilong kisim binatang bilong em i kaikai. Long baksait bilong Mai, wanpela nois i kamap na em i tanim na em i lukim tewel bilong Ku i kam. Mai i pret na guria nogut tru i stap. Ku i tok: "Brata Mai yu no ken pret. Mi kam bilong mitupela i brukim diwai i stap na tudak i kamap." Mai i pret i stap na Ku i tok, na wanpela haus i kamap long dispela ples.

Nau tupela i slip long dispela haus, tasol Mai i



pret yet long tewel bilong Ku bai nogut em i kaikaim em long nait. Ku i kirap na i askim Mai: "Bilong wanem yu pret i stap". Nau em i taim bilong slip. Mai i laik trikim em na i tok: "Mi hangre long wara." Ku i tok: "Gutpela, mi go pulimapim wara bilong yu long dring. Tasol yu no ken holim bilum bilong mi nau mi putim na i go."

Ku i go pinis na Mai i kisim bilum na i lukim 2-pela 2 peni i stap. Lukim tasol na lusim long ples em i bin putim long en bipo. Ku i kam bek wantaim botol wara. Mai i dring na pinisim olgeta.

Nau Ku i tok: "Brata mi lukim yu holim bilum bilong mi". Mai i tok: "Try "Tru mi kisim na lukim tasol. Mi no kisim wanpela

samting long bilum bilong yu." Ku i no mekim wanpela tok. Nau tupela i slip gen. Mai i slip pinis, kwiktaim Ku i kisim 2-pela peni na putim long lewa bilong Mai na i go pinis.

Mai i slip tasol i go na winim 3-pela wik i go pinis. Nau Ku i kam bek gen na tekewe tupela peni long Mai na em i kirap na i (i go moa long pes 15)

Johnson

AUTBOT

i strongpela

gutpela


poroman

Yu ken baim na ol i ken fiksime long:

STEAMSHIPS MACHINERY

na long

OLGETA WOKSAP I SALIM JOHNSON AUTBOT



J2 6h.p.

Dispela spes Yunaitet Pati i baim.



Ol pipel long ples i bin raitim platform bilong Yunaitet Pati olsem, em i platform bilong YU

Sir Tei Abal (*Enga*)

Angmai Bilas (*Madang*)

Andagari Wabiria (*S. Hailans*)

Útula Samana (*Morobe*)



TAIM NAU

mipela i laik wokim olgeta promis

i stap insait long dispela


Yunaitet Pati platform bilong yu

Martin ToVadek (*Is Nu Briten*)

Raphael Doa (*Westen Hailans*)

Paul Langro (*Wes Sepik*)

Akepa Miakwe (*Isten Hailans*)



votim Yunaitet Pati kendidet
na mipela inap long wokim

TAIM NAU Senisim Gavman VOT YUNAITET

Tok orait long dispela tok save i kam long
Sir Tei Abal, CBE., P.O. Box 3534, Port Moresby.

OL PABLIK SEVAN AMAMAS NAU

Ol wokman bilong gavman nau i amamas tru long harim Pablik Sevis Komisin i bin mekim kontrak wantaim union bilong ol pablik seven, em Pablik Sevis Asosiesen.

Dispela kontrak i tok olsem: gavman i mas apim pe bilong ol pablik sevan bai em i skel tru wantaim prais ol i mas peim bilong ol kaikai samting. Inap nau prais bilong ol samting i go antap, tasol pe i no bin go antap inap. Olsem na ol pablik sevan o wokman bilong gavman i wari na i nogut.

Nupela kontrak i min olsem: sapos nau pablik sevan i lusim K9 olgeta wik long baim kaikai, tasol bihain long 6-pela mun dispela sem kaikai i kostim K10, orait, pe bilong man o meri i wok long gavman bai i go antap inap K1 long wan wan wik na em i skel wantaim nupela prais bilong kaikai.

Dispela kontrak i karamapim olgeta manmeri i wok long gavman. Na em bai i stat long namba wan de bilong Septemba.

Na wanpela samting moa i kam insait long dispela

nupela lo. Long taim bilong longpela liv, bai pablik seven i kisim 12 de liv bilong olgeta wan wan yia em i bin wok long gavman. Olsem, sapos em i bin wok inap 5 yia, em nau i kisim 60 de (i olsem tu mun) liv.

Dispela nupela kontrak bai karamapim olgeta pablik sevan inap long 3 yia. Olgeta plisman tu i kam insait pinis long dispela kontrak. Bihain liklik bai olgeta tisa tu i kam insait.

STORI TUMBUNA

(i kam long pes 13)


tok: "Man! Mi slip gut tru". Ku i gude long brata Mai na i tok: "Yu sakim tok bilong mi na yu slip 3-3-pela wik pinis. Nau em i go long ples."

Mai i no gat tok. Em i kam long haus.

Nikolas K. Zawie,
Rintebe/Goroka.



Mista Rabbie Namaliu



Infomesen Opis poto

Dokta Goasa Damena

Wanpela meri i gat bikpela nem long Goroka nau i makim Isten Hailans long Komisin Bilong Bosim Dring. Nem bilong meri em long Misis Ruth Rokam, em i save makim Ret Kros long Goroka. Na em i namba wan taim wanpela meri bilong Isten Hailans i bin kisim dispela wok long Komisin.

Long Isten Hailans wanpela sab-komiti i bin mekim planti kain nupela tingting bilong bosim dring long Provins.


PROVINS I LAIK BOSIM OLGETA BIA

Wanpela sab-komiti long Isten Hailans i no bin tingim sampela nupela aidia bilong winim mani long helpim provins bilong en. Ol dispela tingting i hangamap long pasin Bilong baim na salim bia. Em hia tingting bilong komiti:


- (1) Bisnis kampani bilong Isten Hailans Provinsal Gavman stret, em Nokondi Invesmen Kampani, em wanpela tasol i mas bosim olgeta bikpela bakstua i save salim bia long provins.
- (2) Provinsal gavman i mas tekewe olgeta arapela laisens bilong ol bia bakstua long provins na givim long dispela wanpela Nokondi Kampani tasol.
- (3) Provinsal Gavman i mas putim wanpela takis i go long wan wan botol o kes bia.
- (4) Provins i mas bosim pasin bilong salim ol kes bia na i mas salim long ol wan wan viles klap.

SAPOS YU LAIKIM BATERI TRU YU BAIM DISPELA KAIN

Kaset Bilong Maxell
Em i namba wan tru



Bateri Bilong Maxell
Em i save wok longpela taim tru



distributed by Hagemeyer (PNG) Pty. Ltd.

P.O. Box 673, MADANG
PHONE: 822445


P.O. Box 1428, BOROKO
PHONE: 256144

P.O. Box 63, RABAU
PHONE: 922633

P.O. Box 90, LAE
PHONE: 423200

P.O. Box 11, MT' HAGEN

KISIM HAUS BILONG YU YET



Haus - Olgeta wan wan famili i mas gat rot bilong baim haus. Pangu bai kirapim wanpela nupela pasin yumi i ken kolim "Kisim Haus Bilong Yu Yet." Olgeta man o meri i gat wok mani long ol ples o long ol taun bai i ken kisim mani long Gavman i go inap long Kl000 bilong baim haus bilong em yet.

Sapos yu putim Kl, orait, Gavman tu bai putim Kl. Sapos yu putim K500 gavman tu i putim K500 - mekim Kl000 olgeta bilong baim haus. Na sapos yu putim Kl000 na Gavman tu i putim Kl000 - mekim K2000 olgeta bilong baim haus.

Antap long dispela mani yutupela Gavman i bungim wantaim yu bai inap long kisim long ol beng dinau mani i winim dispela bilong pastaim. Gavman bai sanap long baksait bilong yu long helpim yu long kisim dispela mani.

VOTIM PANGU LONG HELPIM YU

Wingkeo Williong, Nesenel Seketeri, Pangu Pati
P.O. Bokis 623, Port Moresby, i bin oraitim ol dispela tok.

Insait long bikbus klostu long wanpela maunten i luk olsem het bilong Fantom i gat tripela lain pipel i stap. Bikpela lain tru em ol Wambi.



Liklik lain tru, tasol lain i gat bikpela save em ol Ongan.



Tasol lain i laki tru na i gat naispela pipel em lain Longo. Bingo Mi win.



Na dispela bikwin i paitim ol haus bilong ol Wambesi na brukim nabaut wantaim ol gaden na bulmakau



Sampela taim bikwin i kam bagarapim ol bot na umben bilong ol Mori

Tasol ol dispela samting nogut oltaim i abrusim ol Longo... ol i laki tru.



Ol i gat wanem samting mipela i no gat?



Pikinini, yu no ken giaman, yu no ken stil, yu mas bihainim lo na yu no ken resis wantaim ol Longo.

Watpo?



Bikos oltaim ol i save win tasol.

Papa, lukaut long maus bilong yu.



Ol Longo pipel ol i save pinis, lak bilong ol i gat as bilong en.



Em hia dispela tambaran ston i bringim gut lak long ol Longo. Man i tok Kwin Shiba i givim long King Solomon yet.



Em rabis as ples bilong yu, Loka? Na we stap dispela samting ??

Insait.




Em nau

Arakain tru

CONT'D.

NU SILAN I GIVIM 6-PELA BOT OLSEM PRESEN.




Westen Provins oltaim i no save go het gut bikos em i no gat rot. I gat wan wan ples balus. Na long planti tais na wara bilong en ol bot yet i gat hatwok long ran gut. Na tu ol i mas ran longwe moa.

Tasol nau ol Nu Silan i bin wokim wanpela nupela kain pang i save ran gut long ol dispela kain tais na raunwara na riva. Nu Silan i bin givim 6-pela long ol pipel bilong hap bilong Daru long helpim go het bilong ol. Ol i bin traim pinis long Flai Riva na Waroi Riva na Lek Murray. Long dispela kain pang ol i save karim raba na pis na bulmakau na skin pukpuk na olkain kago. Na ol kiap i wok bus i save yusim ol tu.

Ol dispela pang i nara-kain liklik. Ol i gat wanpela disel ensin i isi long ran. Na i no gat koropela. Ensin i dringim wara na bi-hain em i sutim i go ausait strong moa aninit long wara na i subim bot i go. Olsem na ol tri na samting long wara i no ken bulim koropela. Na tu ol i wokim


Hai Komisina bilong Nu Silan, Mista Michael Mansfield, i lukim gut ol i save ranim dispela bot olsem wanem.

Hamilton Jet Aluminium Barge



NUPELA KAIN WOKBOT TRU -

1. i save ran long ples i gat liklik wara tasol
2. inap kam antap stret long wesin bilong nambis
3. i save ran hariap moa long disel ensin
4. i no gat koropela
5. inap karim trakta, ka, ol bulmakau, timba, kago
6. inap karim 60 pasindia
7. i no inap ros
8. gutpela bilong putim frisa bilong karim pis



VINTAS TRADING (PNG) PTY. LTD.

MANUFACTURES' AGENTS & DISTRIBUTORS

TELEPHONE: 258038 TELEX: NE22246 TELEGRAMS "DONAM"

P.O. BOX 128, PORT MORESBY, PAPUA NEW GUINEA
13/62 AHUIA STREET, GORDONS

ol pang long kapa i no ken ras, em ol i kolim aluminium. Wampela dispela kain pang i bin ran long wara Sepik inap long 1000 aua stret na i olsem nupela yet. Em inap stap gut longtaim moa.

Dispela 6-pela pang i bin stap long hap bilong Daru na i wok inap tu mun nau. Tasol long Fonde, 28 Epril, Komisina bilong Nu Silan, Mista Michael Mansfield, i mekim selebresen bilong givim ol pang long han bilong ol Papua Niugini.

Mista Debora Moiba, namba tu presiden bilong Flai Riva Eria Atoriti i kisim 6-pela bot long nem bilong Mista Boyamo Sali, em Minista bilong Praimeri Industri. Mista Sali i no inap kam, long wanem em i gat sik. Nu Silan na Papua Niugini tupela wantaim i pilim dispela kain presen bai helpim gutpela tru long go het bilong Westen Provins, em provins ya i gat planti wara na wara em i rot bilong ol pipel.


Long dispela taim Mista Moiba i bin stretim sampepipel i no save gut long Westen Provins. Em i tok: planti pipel i ting Westen Provins i no gat gutpela ples bilong mekim wok didiman. Em i no tru. Long yia 1966 ol i bin planim sampela raba tri long Kiunga na Lek Murray. Nau i gat moa olsem 1700 hekta raba. Tude wan hap bilong olgeta raba bilong PNG i kam long dispela Westen Provins. Na wok raba i go het gutpela. Man i ting long yia 1981 bai dispela hap inap long groim na kamapim 250 tan raba olgeta yia.

Wok long lukautim bikpela pis Barramundi na tu long groim ol kindam - tupela i bikpela bisnis hia. Long wan wan yia ol man i save painim na salim 300 tan Barramundi pis.

Hai Komisina bilong Nu Silan i tok em i laik kam bek gen long dispela hap na lukim gut ol wok bulmakau na ol pukpuk fam.

Poto long raithan i soim pikinini bilong Provinsal Komisina bilong Westen Provins, i holim stia bilong bot. Provinsal Komisina em Mista Arnold Smare.

Poto daunbilo i soim wampela bot ol i bin bilasim bilong karim Hais Komisina bilong Nu Silan i go lukluk raun long pasis bilong Daru.





Poto antap i soim wanpela nupela bot o pang i ran hariap nabaut long pasis bilong Daru. Ol i bilasim long lip saksak.

Poto daunbilo i soim 4-pela bilong dispela 6-pela bot Nu Silan gavman i bin presen long ol pipel long hap bilong Daru long Westen Provins.



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.